



Mchague Yeye kama Rafiki

Yetu Tunayemwamini

Siwaiti tena watumwa; ... lakini ninyi nimewaita rafiki; kwa kuwa yote niliyoyasikia kwa Baba yangu nimewaarifu.—**Yohana 15:15.**

Uovu unadumu hata sasa. Hatari ya siku za mwisho inaongezeka karibu nasi, na kwa sababu ya kuongezeka maasi upendo wa wengi unapoa. Hili lisingalikuwepo kama wote wangekuja kwa Yesu, na katika imani ya kweli wamtumaini Yeye. Upole na unyenyekevu Wake, unaotunzwa moyoni, utaléta amani na utulivu, na kutoa nguvu za kimaadili kwa kila nafsi.

Ufupi wa wakati unasisitizwa mara kwa mara kama kichocho cha kutafuta haki na kumfanya Kristo kuwa rafiki yetu. Hii isiwe hamasa kuu kwetu; maana ina harufu ya ubinafsi. Je, ni lazima vitisho vya siku ya Mungu viwekwe mbele yetu, ili tuweze kubidishwa kutenda mema kwa njia ya hofu? Haipaswi kuwa hivyo. Yesu anavutia. Amejaa upendo, rehema, na huruma. Anaomba kuwa rafiki yetu, ili atembe nasi kote kwenye njia zinazoparua za maisha. Anatuambia, Mimi ni Bwana Mungu wako; tembea Nami, na kisha nitaijaza njia yako kwa nuru. Yesu, Bwana wa mbinguni, anataka kuwainua katika uhusiano wa karibu wale ambao wanamjia Yeye wakiwa na mizigo yao, udhaifu wao na mahangaiko yao. Atawahesabu kuwa watoto Wake, na hatimaye atawapa urithi ulio wa thamani zaidi ya himaya za wafalme, taji ya utukufu taji iliyo na utajiri mwingi kuliko ambayo imewahi kupamba uso wa mfalme aliyetukuka zaidi wa kidunia.

Ni wajibu wetu kumpenda Yesu kama Mkombozi wetu. Anayo haki ya kudai upendo wetu, lakini anatusihi tumpatie Yeye mioyo yetu. Anaita ili kutembea pamoja Naye katika njia ya utii wa unyenyekevu na wa kweli. Mwaliko Wake kwetu ni wito wa kufikia maisha safi, matakatifu na yenye furaha—maisha ya amani na pumziko, ya uhuru na upendo—na katika utajiri wa urithi wa maisha yajayo na ya milele. Ni kipi tutachagua—uhuru katika Kristo, au utumwa na udhalimu katika huduma ya Shetani? ... Ikiwa tunachagua kuishi na Yesu katika zama zisizokoma za umilele, kwa nini tusimchague Yeye sasa kuwa rafiki yetu mpendwa sana na wakutumainiwa, mshauri wetu bora na mwenye hekima zaidi.

Ni fursa yetu kila siku kuwa na matembezi ya tulivu, ya karibu yaletayo furaha pamoja na Yesu. Hatupaswi kushtushwa ikiwa njia inapitia kwenye migogoro na mateso. Tunaweza kuwa na amani ipitayo ufahamu; lakini itatugharimu vita dhidi ya nguvu za giza, mapambano makali dhidi ya ubinafsi na dhambi ya asili. Ushindi unaopatikana kila siku kwa bidii na ustahimilivu usiochoka kutenda meina utakuwa wa thamani kwa Yesu ambaye ametupenda, ambaye alijitoa nafsi Yake kwa ajili yetu, ili atukomoe na uasi wote, na kujisafishia “watu wawe milki Yake mwenyewe, wale walio na juhudi katika matendo mema”....

Mwana wa Aliye Juu alipitia aibu pale msalabani, ili wenye dhambi wasipate aibu na kudharauliwa milele, bali wakombolewe, na kuvikwa taji ya utukufu wa milele (The Signs of the Times, Machi 17, 1887).